

每週經課朗誦經文(巴克禮漢羅/教羅)2014/09/14

共同經課 - 1

出埃及記十四章十九節~三十一節

19 上帝 ê 使者，本行 tī 以色列 ê 營前 ê，徙來行 tī in ê 後面；雲柱也 tùi in ê 頭前，徙來 khiā tī in ê 後面，20 tī 埃及營 kap 以色列營 ê 中間；hit-pêng 有雲有烏暗，chit-pêng 暝時發出光；thong 暝兩 pêng boē 相近。21 摩西就伸手 kí 海，耶和華 thong 暝 hō 東風大起，hō 海退去，水就分開，海就成做乾地。22 以色列人落海中行乾地，水 tī in ê 雙 pêng 成做牆壁。23 埃及人追 jip in；法老一切 ê 馬、車，kap 馬兵，lóng tè in 到海中。24 到天 beh 光 ê 時，耶和華 tùi 雲 kap 火 ê 柱中 à 落，看埃及 ê 軍隊，phah 亂 in ê 隊伍；25 koh hō in ê 車輪 lak 落，oh 得行；致到埃及人講：咱 tiòh tùi 以色列人 ê 面前逃走，因為耶和華為 tiòh in kap 埃及人交戰。26 耶和華 kā 摩西講：你伸手 kí 海，hō 水 tò-túg 來淹埃及人，kap in ê 車，in ê 馬兵。27 摩西就伸手 kí 海；到天一下光，海水 koh 照舊；埃及人逃走，水遮(cháh)tī in ê 頭前；耶和華就將埃及人車倒 tī 海中。28 水就反流，淹密 hiah ê 車 kap 馬兵；法老 ê 全軍 tè 以色列人落海 ê，連一個也無留 teh。29 總是以色列人 tī 海中行乾地，水 tī in ê 雙 pêng 成做 in ê 牆壁。30 Hit 日耶和華 án-ni 救以色列人脫離埃及人 ê 手；以色列人看見埃及人 ê 屍屍 tī 海邊。31 以色列人看見耶和華對埃及人所行 ê 大事，就敬畏耶和華；koh 信服耶和華 kap 伊 ê 奴僕摩西。

共同經課 - 2

出埃及記十五章一 b 節~十一節，二十節~二十一節

1 我 beh 唱歌 o-ló 耶和華，因為伊至高至大；將馬 kap 騎馬 ê hiat tī 海中。2 耶和華是我 ê 氣力，是我 ê 詩歌，也是做我拯救 ê 主；伊是我 ê 上帝，我 beh o-ló 伊，是我 ê 父 ê 上帝，我 beh 尊伊最大。3 耶和華是戰士；伊 ê 名是耶和華。4 法老 ê 車，kap 伊 ê 軍兵，耶和華 hiat 伊 tī 海中；伊特別揀 ê 軍長，lóng 沉 tī 紅海。5 深淵蓋 in；In 親像石頭，墜到深 ê 所在。6 耶和華 ah，你 ê chià 手展出能力，得 tiòh 榮光；耶和華 ah，你 ê chià 手 phah 碎對敵。7 你發出大威嚴，車倒 hiah ê 起來攻擊你 ê；你發出大受氣，燒毀 in 親像燒草。8 你發出鼻中 ê 氣，水就 ná-chhèng ná 高，大水 khiā 起來親像 kui 堆；海中 ê 深水堅定。9 對敵講：我 beh 追 in，我 beh jip-tiòh in，我 beh 分所搶 ê 物；我 beh tī in 來足我 ê 心願；我 beh 拔刀，我 ê 手 beh 滅 in。10 你一下 pùn 風，海就蓋密 in；In 親像鉛(iân)，沉 tī 大水中。11 耶和華 ah，chiah ê 上帝(=神明)ê 中間，chī-chhui 能親像你？Chī-chhui 親像你，至聖 thang 榮光，威嚴 thang o-ló，行出奇事？12 你伸出 chià 手，地就吞滅 in。13 你用你 ê 慈愛，chhoā 你所救贖 ê 百姓；你用你 ê 權能，chhoā in 入你聖 ê 所在。14 列邦聽見就 ngiāuh-ngiāuh-chhoah；Khiā 起 tī 腓利土地 ê，tú-tiòh 痛苦。15 Hit 時 Í-tong ê 族長 gông-ngiāh；Mô-ap 英雄 ê 人致到 ngiāuh-ngiāuh-chhoah，迦南地 khiā 起 ê 百姓，心 lóng 消溶。16 Gông-ngiāh 驚惶到 tī in；耶和華 ah，因為你 ê 手 ê 大權能，in 定定親像石頭，Thèng 候你 ê 百姓經過，Thèng 候你所得 tiòh ê 百姓過去。17 你 beh chhoā in 入去，栽培 in tī 你 ê 產業 ê 山，耶和華 ah，就是你為家己所備辦 khiā 起 ê 所在，主 ah，就是你 ê 手所建立 ê 聖所。18 耶和華 beh 做王，直到永遠。19 因為法老 ê 馬，kap 伊 ê 車，伊 ê 馬兵，到 tī 海中，耶和華 hō 海水反流淹密 in；獨獨以色列人 tī 海中行乾地。20 亞倫 ê 大姊女先知 Bí-lī-àm，手裡 kiáh lín-long 鼓，眾婦女也 tè 伊出去，kiáh lín-long 鼓跳舞。21 Bí-lī-àm 和所唱 ê 講：Lín tiòh 唱歌 o-ló 耶和華，因為伊至高至大；將馬 kap 騎馬 ê，hiat tī 海中。

共同經課 - 3

羅馬書十四章一節~十二節

1 信軟 chiá 人，lín tiòh 接納伊；m̄ 是 beh 辯論所僥疑 ê。2 有人信百項物 lóng thang 食；獨獨信軟 chiá 人 ê 是食菜蔬。3 食 ê 莫得看輕無食 ê；無食 ê bôh 得擬議食 ê；因為上帝已經接納伊。4 你是 chī-chhui teh 擬議別人 ê 奴僕 ah？伊 khiā 在 á 是跌倒，自然有伊 ê 主人 tī-teh。但是伊 beh khiā 在，因為主會 hō 伊 khiā 在。5 有人擬斷 chit 日贏 hit 日；有人擬斷日日 lóng 相同；tāk 人心內 tiòh 認起真。6 守日 ê 是為 tiòh 主來守；食 ê 為 tiòh 主來食，因為伊感謝上帝；無食 ê 也為 tiòh 主來無食，也感謝上帝。7 因為咱無人為 tiòh 家己來活，也無人為 tiòh 家己來死。8 因為咱若活，是為 tiòh 主來活；死，也是為 tiòh 主來死；所以咱，或是活或是死，lóng 屬 tī 主。9 因為基督所以死來 koh 活，是 beh 做活 ê 死 ê 主。10 Ta 你啥事擬議你 ê 兄弟？也你啥事看輕你 ê 兄弟？因為咱眾人 lóng beh khiā tī 上帝公座前。11 因為有記載講，主講，我既然是活 ê，萬腳頭 u beh 跪我，萬嘴舌 beh o-ló 上帝。12 Án-ni 咱 tāk 人 beh 排列家己 ê 事 tī 上帝 ê 面前。

共同經課 - 4

馬太福音十八章二十一節~三十五節

21 Hit 時彼得 oá 來 kā 伊講，主 ah，我 ê 兄弟得罪我，我赦免伊 tiòh 幾 pái？Tiòh 七 pái mah？22 耶穌 kā 伊講，我無 kā 你講 tiòh 到七 pái，就是到七十 ê 七 pái。23 所以天國比並人君 ài beh kap 伊 ê 奴僕算賬。24 起頭算 ê 時，有 chhoā 一個欠伊千萬銀 ê 來。25 既然無 thang 還，伊 ê 主人命令 tiòh 賣伊本身，kap 伊 ê bó-kiá，連伊一切所有 ê，來還。26 Hit ê 奴僕就仆 teh，拜伊，講，主 ah，tiòh 寬容我，我 beh lóng 總還。27 奴僕 ê 主人就憐憫來放伊，koh 赦免伊 ê 債。28 Hit ê 奴僕出去，tú-tiòh 伊一個同做奴僕 ê，欠伊一百 ê 銀 á，就掠伊，又伊 ê 領頸，講，你所欠 ê tiòh 還。29 同做奴僕 ê 仆 teh，求伊講，Tiòh 寬容我，我 beh 還你。30 若是伊 m̄ 肯，就去 kā 伊關落監，來 thèng 候伊還所欠 ê。31 Chiah ê 同做奴僕 ê 看見 chit ê tai-chì，真憂悶，將 lóng 總 ê 事對主人講明。32 Tùi án-ni 伊 ê 主人召伊來，kā 伊講，Phái 奴僕 ah，因為你對我求，我就將你所欠 ê lóng 赦免。33 你 kiám m̄ tiòh 憐憫你同做奴僕 ê，親像我憐憫你？34 伊 ê 主人受氣，將伊交代刑杖，thèng 候伊一盡還所欠 ê。35 Án-ni lín tāk 人無用心赦免 lín ê 兄弟，就我 ê 天父也 beh án-ni 款待 lín。